



Cussegl da vischnaunca
M 1-2021/2024

M o z i u n

"Il delinquent luf" Ecurir cun la Regenza grischuna ina sligiazium!

Ils davos onns ei il luf sederasaus mordio tier nus en las valladas grischunas. Che nossa natira marvegliusa serevegn adina puspei persula ed era ch'ils animals scarponts tuornan anavos tier nus en nossas cuntradas fuss da principi ina biala caussa, denton sco ei semuossa di per di ei quei mo pusseivel cun reglar e decimar ils trieps dils lufs. Nos antenats havevan ragischau ora quels animals scarponts. Quei ei segir schabegiau per motivs da saun giudezi e tema d'existenza da lezs onns.

Ins auda adina puspei ch'il luf attacca ni scarpa nuorsas, vadials, asens e schizun vaccas. Segiramein daventan era ils animals selvadis unfrendas dil luf. Ils purs han da purtar in grond buordi si dies, damai che lur nuorsas e schizun biestga vegnan attaccadas dil luf. Nossa Confederaziun pren encunter las reclamaziuns, denton fatg vegn ei ton sco nuot. Ei vegn mess si prescripziuns novas per part fetg caras sco ins savess segirar ils animals da nez, denton cun ina sligiazium prudenta che cuntentass tuts e gidass, vegnan ei buc!

Entginas da nossas alps vegnan ord malsegirtad e tema dil luf gnanc pli cultivadas e nezegiadas. Tier tgei meina quei scenari pomai?

Ils 11 da november 2021 han convischinas e convischins d'Acletta schizun saviu observar e perseguitar in luf avon casa. El semuentava pacific sper la piazza da termagliar dil vitg da vacanzas dalla Reka. Tgei cletg ch'il vitg da vacanzas era serraus, aschia che negins affons sesanflavan sin la piazza da termagliar. Tgei schabegia sche affons che van a scola entaupan in luf? Gnanc da patertgar sch'ei setracta in di d'in triep lufs. Era il runal da skis per affons sesanfla gest leu ad Acletta. Sto ei veramein schabegiar gl'emprem enzatgei cun ils carstgauns, avon che la Confederaziun svizra e nossa Regenza grischuna fan enzatgei en caussa? Ei cloma da reglar ils trieps, decimar e tener controllau quels.

Cun ils arguments suramenziunai giavischa il cussegl da vischnaunca dalla suprastanza communal:

Da sclarir cun il cantun pusseivladads cuntenteivlas per la protecziun dil carstgaun e d'animals encunter il luf.

Cusseglieras e cusseglers che giavischan medemamein pusseivladads:

Giusep Lozza

Silvia Bucheli-Caduff
Adrian Deflorin
Armin Manetsch

Armin Berther
Adrian Flepp
Helga Probst-Linder

Theres Burri Gadola
Mario Flepp
Ignaz Venzin

Disentis/Mustér, ils 17 da november 2021

Surdau: venderdis, ils 19 da november 2021

Posiziun dalla suprastonza communal

1. General

La suprastonza communal ei ladinamein suenter che la moziun ei vegnida inoltrada a caschun dalla seduta dil cussegl da vischnaunca dils 19 da november 2021 semessa en contact cul cusseglier guvernativ Mario Cavigelli, cau dil departament d'infrastructura, energia e mobilitad. El ei era il suprem digl uffeci da catscha e pesca.

A caschun dil discuors cun cusseglier guvernativ Mario Cavigelli ha il schef digl uffeci da catscha e pesca dil Grischun, Adrian Arquint, tarmess ils 12 da schaner 2022 ina posiziun a scret enviers la moziun (mira annexa).

Plinavon ei signur Arquint sedeclaraus prompts (ev. era il conluvrer academic per animals da rapina, Arno Puorger) da dar sclariment resp. plaid e fatg a caschun dalla sesida dil cussegl da vischnaunca dils 28 da schaner 2022.

La suprastonza communal ei dependenta digl agir digl uffeci da catscha e pesca. La vischnaunca ha negina basa legala d'agir en caussa. Il cantun Grischun segida tenor sias pussevkladads giuridicas aschi bein sco pusseivel.

Ina caussa clara ei che nus stuein emprender da viver cul luf e sias bunas sco era schliatas varts pigl uaul, l'agricultura, il turissem e la catscha.

A caschun dalla viseta dil referent duei vegnir tschentau las damondas necessarias per saver prender ina decisiun en caussa.

2. Proposta

Sebasond sin la posiziun dil schef digl uffeci da catscha e pesca dil Grischun, signur Adrian Arquint

r e c a m o n d a

la suprastonza communal al cussegl da vischnaunca:

1. da buca acceptar la moziun "Il delinquent luf" (M 1-2021/2024), inoltrada ils 19 da november 2021.

Suprastonza communal Disentis/Mustér
Il president: Il canzlist:


René Epp


Andri Hendry

Disentis/Mustér, ils 17 da schaner 2022